

四庫全書

集部

欽定四庫全書

集部

梅村集卷五

詳校官內閣中書_臣陸湘

助教_臣常循覆勘

總校官知縣_臣楊懋珩

校對官待詔_臣胡士震

謄錄監生_臣葉中桂

欽定四庫全書

梅村集卷五

國子監祭酒吳偉業撰

七言古詩二

東萊行

為姜如農如
須兄弟作也

漢皇策士天人畢二月東巡臨碣石獻賦凌雲魯兩生
家近蓬萊看日出仲孺召入明光宮補過拾遺稱侍中
叔子輜軒四方使一門二妙傾山東同時里人官侍從

左徒宋玉君王重就中最數司空賢三十孤卿需大用
君家兄弟俱承恩感時危涕長安門侍中叩閣數彊諫
上書對仗彈平津天顏不懌要人怨衛尉捉頭摔下殿
中旨傳呼赤棒來血裹朝衫路人看愛弟棄官相追從
避兵盡室來江東本為逐臣溝壑裏却因奉母亂離中
三年流落江湖夢茂陵荒草西風慟頭顱雖在故人憐
髀肉猶為舊君痛我來扶杖過山頭把酒論文遇子由
異地客愁君更遠中原同調幾人留司空平昔耽佳句

千首詩成罷官去戰鼓東來白骨寒二勞山月魂何處
左氏勲名照汗青過江忠孝數中丞孺卿也向龍沙死
柴市何人哭子卿只君兄弟天涯客漂零尚是烟霜隔
思歸詩寄廣陵潮憶弟書來虎丘石回首風塵涕淚流
故鄉蕭瑟海天秋田橫島在魚龍冷欒大城荒草木愁
當日竹宮從萬騎祀日歌風何意氣斷碑年月記乾封
柏梁侍從誰承制魯連蹈海非求名鴟夷一舸寧逃生
丈夫淪落有時命豈復悠悠行路心我亦滄浪釣船繫

明日隨君買山住

鴛湖曲

鴛鴦湖畔草粘天二月春深好放船
柳葉亂飄千尺雨桃花斜帶一溪烟
烟雨迷離不知處舊堤却認門前樹
樹上流鶯三兩聲十年此地扁舟住
主人愛客錦筵開水閣風吹笑語來
畫鼓隊催桃葉伎玉簫聲出柘枝臺
輕靴窄袖嬌韃束脆管繁絃競追逐
雲鬟子弟按霓裳雪面參軍舞鸚鵡
酒盡移船曲榭西滿湖燈火醉人歸

朝來別奏新翻曲更出紅粧向柳堤歡樂朝朝兼暮暮
七貴三公何足數十幅蒲帆幾尺風吹君直上長安路
長安富貴玉驄嬌侍女薰香護早朝分付南湖舊花柳
好留烟月伴歸橈那知轉眼浮生夢蕭蕭日影悲風動
中散彈琴竟未終山公啟事成何用東市朝衣一旦休
北邙坏土亦難留白楊尚作他人樹紅粉知非舊日樓
烽火名園竄狐兔畫閣偷窺老兵怒寧使當時沒縣官
不堪朝市都非故我來倚棹向湖邊烟雨臺空倍惘然

芳草乍疑歌扇綠落英錯認舞衣鮮
人生苦樂皆陳迹
年去年來堪痛惜聞笛休嗟石季倫
銜杯且效陶彭澤
君不見白浪掀天一葉危收竿還怕
轉船遲世人無限
風波苦輸與江湖釣叟知

項黃中家觀萬歲通天法帖

王氏勲名自始興後人書法擅精能
江東將相傳家在
翰墨風流天下稱前有瑯琊今攜李
項氏由來堪竝美
襄毅旂常戰伐高墨林書畫聲名起
當時海內號收藏

秘閣圖書玉軸裝近代丹青推董巨名家毫素重鍾王
鍾王妙蹟流傳舊貞觀在御窮搜購盡隨萬乘入昭陵
人間一字無遺漏碑石猶存腕鋒出風摧雨剝苔文脫
棗木鐫來波磔非牋麻搨就戈鋌失君家此書何處傳
云是萬歲通天年則天酷嗜二王法詔求手迹千金懸
從官方慶拜表進臣祖羲獻與僧虔生平行草數十紙
龍蛇盤蹙開天顏賜官五階帛百疋仍勅能手雙鉤填
裝成用寶進御府不知何事流人間我思羲之負遠略

北伐貽書料強弱惜哉徒令書畫傳誓墓功名氣蕭索
江東無事富山水興來灑筆臨池樂足知文采賴昇平
父子優游擅家學只今海內無高門稽山越水烽烟作
春風掛席由拳城夜雨君齋話疇昨嗚呼吾友雅州公
舒毫落紙前人同一官烏撒沒坏土萬卷青箱付朔風
少伯湖頭鼙鼓動尚書第內烟塵空可憐累代圖書盡
斷楮殘編墨林印此卷仍逃劫火中老眼縱橫看筆陣
君真襄毅之子孫相逢意氣何相親卽看書畫與金石

訪求不屑辭家貧嗟乎世間奇物戀故主留取縹緗傲
絕倫

送徐次桓歸胥江草堂

春來放櫂駕湖游杉青牕畔登高樓
褰裘徐郎最年少坐中搖筆烟霞收
裝隨到我海濱去雞黍流連別何遽
云過胥江舊草堂乃父淒涼讀書處
滄山突兀枕江濱伍相祠荒對夕曛
我是故人同李子十年相識憶徐君
只今孺子飄零客蘆中窮士無人識
掛劍雖存舊業非

吹簫未遇吾徒惜歸去還登漁父船南枝越鳥竟誰憐
投金瀨在王孫泣白馬江聲遶舍邊

畫蘭曲

畫蘭女子年十五生小琵琶怨春雨記得粧成一見時
手撥簾帷便爾汝蜀紙當窓寫畹蘭口脂香動入毫端
腕輕染黛添芽易釧重舒衫放葉難似能不能得花意
花亦如人吐猶未珍惜沉吟取格時看人只道儂家媚
橫披側出影重重取次腰肢向背同昨日一枝芳砌上

折來雙髻鏡臺中玉指纔停弄絃索漫攏輕調似花弱
殷勤彈到別離聲雨雨風風聽花落花落亭皋白露溥
舊根易土護新寒可憐明月河邊種移入東風碧玉欄
聞道羅幃怨離索麝媒鵝絹閒嘗作又云憔悴非昔時
筆牀翡翠多零落今年掛楫洞庭舟柳暗桑濃菴綺樓
度曲佳人遮鈿扇知書侍女下瓊鉤主人邀我圖山色
宣索傳來畫闌筆輕移牙尺見勾踐側偃銀毫憐吮墨
席上回眸惜雁筍醉中適口認魚羹茶香黯淡知吾性

車馬雍容是故情常時對面憂吾瘦淺立斜窺訝依舊
好將獨語過黃昏誰堪幽夢牽羅袖歸來開篋簡啼痕
腸斷生綃點染真何似杜陵春禊飲樂游原上采蘭人

送杜公弼武歸浦口

將軍威名著關隴紫面虬髯鋒骨竦西州名士重人豪
北地高門推將種起家二十便登壇氣壓三河震百蠻
夜半旌旗度青海雪中笳鼓動蕭關當時海內稱劉杜
死事忠勲君叔父黃砂磧上起豐碑李氏功名何足數

君為猶子有家風都護防秋杖節同白帝傳烽移劍外
黃巾聞警出榆中功敗垂成謀不用十年心力堪悲痛
只今天地滿風塵餘生淪落江南夢江南烟雨長菰蒲
蟹舍魚莊家有無醉裏放歌衰髮短狂來搖筆壯心蘇
自言少年好詩酒學佛求仙徧師友牀頭真訣幸猶在
肘後陰符復何有嗟余憔悴卧江潭騎省哀傷初未久
君來一見卽論文謂結婚姻商不朽蹉跎此意轉成空
自恨愆期負若翁非是雋君辭霍氏終然丁掾感曹公

此後相逢輒悲歎秦關何處鄉書斷苦憶江南欲住難
羈棲老病無人看三經出塞五專征一卷詩書記姓名
奴僕旌旄多甲第親朋兵火刺浮生重向天涯與我別
憑欄把酒添淒咽烟水蘆花一雁飛回頭却望江南月

蘆洲行

江岸蘆洲不知里積浪吹沙長灘起云是徐常舊賜莊
百戰勲名照江水祿給朝家禮數優子孫萬石未云酬
西山詔許開煤冶南國恩從賜荻洲江水東流自朝暮

蘆花瑟瑟西風渡金戈鐵馬過江來朱門大第誰能顧
惜薪司按先朝冊勲產蘆洲追籽粒已共田園沒縣官
仍收子弟徵租入我家海畔老田荒亦長蘆根豈賜莊
州縣逢迎多妄報排年賠累是重糧大量親下稱蘆政
鞭笞需索輕人命胥吏交關橫派征差官恐喝難供應
江南尺土有人耕踏勘終無豪占情徒起再科民力盡
却虧全課國租輕

積年升科老田本漕白重課指為無
糧侵占故有重糧再科後重糧去而

定為蘆課視原額反少減矣甚
言害民而又損國其無益如此

詔書昨下知民病解頭使用今朝定早破城中數百家
蘆田白售無人問休嗟百姓困誅求憔悴今看舊五侯
只好負薪煨馬矢敢誰伐荻上漁舟君不見舊洲已沒
新洲出黃蘆收盡江潮白萬束千車運入城草場馬廐
如山積樵蘇猶向鍾山去軍中日日燒陵樹

捉船行

官差捉船為載兵大船買脫中船行中船蘆港且潛避
小船無知唱歌去郡符昨下吏如虎快槳追風搖急櫓

村人露肘捉頭來背似土牛耐鞭苦苦辭船小要何用
爭執沟沟路人擁前頭船見不敢行曉事篙師歛錢送
船戶家家壞十千官司查點候如年發回仍索常行費
另派門攤云雇船君不見官舫鬼戕無用處打鼓插旗
馬頭住

馬草行

秣陵鐵騎秋風早廐將圉人索芻藁當時磧北起蒲梢
今日江南輸馬草府帖傳呼點行速買草先差人打束

香芻堪秣飽驂騑不數西涼誇昔當京營將士導行錢
解戶公攤數十千長官除頭吏乾沒自將私價僦車船
苦差常例須應免需索停留終不遣百里曾行幾日程
十家早破中人產半路移文稱不用歸來符取重裝送
推車挽上秦淮橋道遇將軍紫駟鞚轅門芻豆高如山
長衫沒髀看奚官黃金絡頸馬肥死忍令百姓愁饑寒
回首當年開僕監龍媒烙字麒麟院天閑轡逸起黃沙
游北三千滿行殿蔣山南望獵痕燒放牧秋原見射鵬

寧莖雕胡供伏櫪不堪極目草蕭蕭

題志衍所畫山水

畫君故園之書屋午榻茶煙蒔花竹著我溪邊岸葛巾
十年笑語連床宿畫君蜀道之艱難去家萬里誰能還
戎馬千山西望哭杜鵑落月青楓寒今之此圖何者是
黯澹蒼茫惟一紙想像雲山變滅中其人與筆寧生死
我思此道開榛蕪東南畫脈多蕭疎君嘗展卷向予說
得及荆關老輩無巫山巫峽好粉本一官大笑誇吾徒

此行歸來掃素壁捫腹滿貯青城圖只今猶是江南樹
憶得當時送行處楊柳青青葭邊雙漿搖君此中去

題蘇門高士圖贈孫徵君鍾元

容城人
孝廉

蘇門山水天下殊中有一人清且癯龐眉扶杖白髭鬚
鵝冠野服談詩書定州城北滹水瀦白沙村畔為吾廬
少年蹀躞千金駒獻策天子來皇都腰鞬三矢玉鹿盧
幽州臺上為歡娛日暮酒酣登徐無顧視同輩誰能如
十人五人居要樞拖金橫玉當朝趨今我不第胡為乎

有田一廛書百厨雞泉馬水吾歸歟七徵不起乘柴車
當時猶是昇平餘一朝鐵騎城南呼長刀斫背將人驅
里中大姓高門閭鞭笞不得留須臾叩頭莫敢爭高腴
乞為佃隸租請輸牽爺擔子立兩衢問言不荅但欷歔
先生閉門出無驢僵卧一榻絕朝餽弟子二人昇籃輿
百門書院今空虛此中聞是孫登居太行秀色何盤紆
檣楠榛栗松杉儲風從中來十萬株嘯臺遺址烟霞俱
流泉百道穿堦除幅巾短髮不用梳彈琴橫卷心安舒

微言妙旨如貫珠考鐘擊磬吹笙竽古文屋壁闡禹謨
異人手授先天圖談仁講義追堯夫後來姚許開榛蕪
斯文不墜須吾徒誰傳此圖來江湖使我一見心踟躕
即今絕學誰能扶屈指耆舊堪嗟吁蘇門山下有碩儒
中原學者多沾濡百年文獻其存諸我往從之歌黃虞
壽總憲龔公芝麓

丈夫四十致卿相努力公孤方少壯握手開尊話疇昔
故人一見稱無恙當初海內苦風塵解褐才名便絕倫

官守蘄春家近楚賊窺江夏路通秦書生年少非輕敵
擐甲開門便迎擊詩成橫槊指黃巾戰定磨崖看赤壁
我同宋玉適來游多士名賢共校讐此地異才為亂出
論文高詆鎖廳秋別後相思隔江水黑山鐵騎如風雨
聞道黃州數被兵讀書長嘯重圍裏荏苒分飛十八年
我甘衰白老江邊那知風雪嚴城鼓重謁三公祭戟前
即君致身已昂足正色趨朝勤補牘異書捫腹五千卷
美酒開顏三百斛月明歌舞出簾櫳刻燭分題揮灑中

談笑阮生青眼客文章王掾黑頭公却思少小經離亂
銅駝荆棘尋常見側身天地竟何心過眼風光有誰羨
楚水吳山思不禁朝衫欲脫主恩深待看賀監歸來歲
勾漏丹砂本易尋

王郎曲

王郎十五吳趨坊覆額青絲白晢長孝穆園亭常置酒
風流前輩醉人狂同伴李生柘枝鼓結束新翻善財舞
鎖骨觀音變現身反腰貼地蓮花吐蓮花婀娜不禁風

一斛珠傾宛轉中此際可憐明月夜此時脆管出簾櫳
王郎水調歌緩緩新鶯嘹啞花枝暖慣拋斜袖卸長肩
眼看欲化愁應懶摧藏掩抑未分明拍數移來發曼聲
最是轉喉偷入破殢人腸斷臉波橫十年芳草長洲綠
主人池館惟喬木王郎三十長安城老大傷心故園曲
誰知顏色更美好腫神剪水清如玉五陵俠少豪華子
甘心欲為王郎死寧失尚書期恐見王郎遲寧犯金吾
夜難得王郎暇坐中莫禁狂呼客王郎一聲聲頓息移

牀欹坐看王郎都似與郎不相識往昔京師推小宋外
戚田家舊供奉只今重聽王郎歌不須再把昭文痛時
世工彈白翎雀婆羅門舞龜茲樂梨園子弟愛傳頭請
事王郎教弦索耻向王門作伎兒博徒酒伴貪歡謔君
不見康崑崙黃幡綽承恩白首華清閣古來絕藝當通
都盛名肯放優閒多王郎王郎可奈何

王郎名稼字紫稼於勿齋徐先

生二林園中見之髻而皙明慧善歌今秋遇于京師相
去已十六七載風流儇巧猶承平時故習酒酣一出其
伎坐上為之傾靡余此曲成合肥龔公芝麓口占贈之
曰薊苑霜高舞柘枝當年楊柳尚如絲酒闌却唱梅村

曲腸斷王
郎十五時

楚兩生行

并序

蔡州蘇崑生維揚柳敬亭其地皆楚分也而又
客於楚左寧南駐武昌柳以談蘇以歌為幸舍
重客寧南沒於九江舟中百萬衆皆奔潰柳已
先期東下蘇生痛哭削髮入九華山久之出從
武林汪然明然明亡之吳中吳中以善歌名海
內然不過嘽緩柔曼為新聲蘇生則於陰陽抗

墜分判比度如崑刀之切玉叩之栗然非時世
所為工也嘗遇虎丘廣場大集生睨其芻笑曰
某郎以某字不合律有識之者曰彼傖楚乃竊
言是非思有以挫之間請一發聲不覺屈服顧
少年耳剝日久終不肯輕自貶下就蘇生問所
長生亦落落難合到海濱寓吾里蕭寺風雪中
以余與柳生有雅故為立小傳援之以請曰吾
浪跡三十年為通侯所知今失路憔悴而來過

此惟願公一言與柳生並傳足矣柳生近客於
雲間帥識其必敗苦無以自脫浮湛敖弄在軍
政一無所關其禍也幸以免蘇生將渡江余作
楚兩生行送之以之寓柳生俾知余與蘇生游
且為柳生危之也

黃鵠磯頭楚兩生征南上客擅縱橫將軍已沒時世換
絕調空隨流水聲一生挂頰高談妙君卿唇舌淳于笑
痛哭長因感舊恩詎嘲尚足陪年少途窮重走伏波軍

短衣縛袴非吾好，抵掌聊分幕府金。
褰裳自把江村釣，一生嚼徵與含商。
笑殺江南古調亡，洗出元音傾老輩。
疊成妍唱待君王，一絲縈曳珠盤轉。
半黍分明玉尺量，最是大堤西去曲。
累人腸斷杜當陽，憶昔將軍正全盛。
江樓高會誇名勝，生來索酒便長歌。
中天明月軍聲靜，將軍聽罷據胡牀。
撫髀百戰今衰病，一朝身死墜降幡。
貔貅散盡無橫陣，祁連高塚泣西風。
射堂賓客嗟蓬鬢，羈棲孤館伴斜曛。
野哭天邊幾處聞，草滿獨尋江令宅。

花開閒弔杜秋墳
鵲絃屢換尊前舞
鼉鼓誰開江上軍
楚客祇憐歸未得
吳兒肯道不如君
我念邦江頭白叟
滑稽幸免君知否
失路徒貽妻子憂
脫身莫落諸侯手
坎壈繇來為盛名
見君寥落思君友
去年來消息稀
寄爾新詩同一首
隱語藏名代客嘲
姑蘇臺畔東風柳

葺城行

朝出胥門塘暮泊佘山麓
芻帶三江襟
扈瀆五葺城是
何王築
泖塔霜高稻葉黃
澱湖雨過葺絲綠
百年以來

誇勝事丹青圖卷高珠玉學士揮毫清秘樓徵君隱几
逍遙谷前輩風流書畫傳後生賢達聲華續給事才名
矯若龍山公人地清如鵠汗簡銷沉又幾秋滄江屢建
高牙纛不知何處一將軍到日雄豪炙手薰羊侃後房
歌按隊陳稀賓客劍成羣刻金為漏三更箭錯寶施牀
五色文異物江淮常月進新聲京雒自天聞承恩累賜
華林宴歸鎮高談橫海勲未見尺書收草澤徒誇名字
得風雲此地江湖綰鎖鑰家擅陶朱戶程卓十箱布帛

運輶車百貨魚鹽充邸閣將軍一一數高貲下令搜牢
徧墟落非為仇家告併兼即稱盜賊通囊橐望屋遙窺
室內藏算緡似責從前諾敢信黔婁脫網羅早者猗頓
填溝壑窟室飛觴傳箭催博場戲責橫刀索縱有名豪
解折行可堪小戶勝狂藥將軍沉湎不知止箕踞當筵
任頤指拔劍公收伍伯妻鳴髀射殺良家子江表爭猜
張敬兒軍中思縛盧從史枉破城南十萬家養士何無
一人死貪財好色英雄事若輩屠沽安足齒君不見夫

差獵騎何翩翩五茸春草城南天雉媒飛起發雙矢西
施笑落珊瑚鞭湖山足紀當時勝歌舞猶為後代傳陸
生文士能為將勲名三世才難量河橋雖敗事無成睥
睨千秋肯誰讓代有文章占數公烟霞好處偏神王兵
火燒殘萬卷空大節英聲未凋喪一朝遽落老兵手百
里溪山復何有已見衣冠拜健兒苦無丘壑安窮叟茸
城楊柳鬱婆娑欲繫扁舟奈晚何盤龍浦上行人少唳
鶴灘頭戰艦多我望嚴城聽街鼓鱸魚沽酒扣舷歌側

身回視忽長笑此亦當今馬伏波

贈吳錦雯兼示同社諸子

吾家季重才翩翩身長七尺虬鬚髯投我新詩百餘軸
滿牀絹素生雲烟自言里中有三陸長衫拂髀矜豪賢
弟先兄舉致身早我亦挾策遊長安其餘諸子俱嶽嶽
感時上策愁祁連會飲痛哭岳祠下聞者大笑驚狂顛
臯亭山頭金鼓震萬騎蹴踏東南天貽書訣別士龍死
嗚呼吾友非高官餘或脫身棄妻子西興潮落無歸船

我因老親守窮巷買山未得囊無錢息心掩閑謝時輩
五年不到西溪邊比因訪客過山寺故人文酒相盤桓
手君詩篇令我讀使我磊落開心顏豈甘不死愧良友
欲使奇字留人間跳刀拍張雖將相有書一卷吾徒傳
吾聞其語重歎息平生故舊空茫然不信扁舟偶乘興
丁儀吳質追隨歡酒酣對客作長句十紙謾謾松風寒
後來此會良不易況今海內多艱難安得與君結廬住
南山著述北山眠

蕭史青門曲

蕭史青門望明月碧鸞尾掃銀河濶好時池臺白草荒
扶風郎舍黃塵沒當年故后婕妤家槐市無人噪晚鴉
却憶沁園公主第春鶯啼殺上陽花嗚呼先皇寡兄弟

天家貴主稱同氣奉車都尉誰最賢輩公才地如王濟
被服依然儒者風讀書妙得公卿譽大內傾宮嫁樂安
光宗少女宜加意正值官家從代來王姬禮數從優異
先是朝廷啓未央天人寧德降劉郎道路爭傳長公主

夫壻豪華勢莫當百兩車來填紫陌千金槩送出雕房
紅窓小院調鸚鵡翠館繁箏叫鳳皇白首傳璣阿母飾
綠鞵大袖騎奴裝灼灼大桃共穠李兩家姊妹騎紈綺
九子鸞雛闔玉釵釵工百萬恣求取屋裏熏爐滃若雲
門前鈿轂流如水外家肺腑數尊親神廟榮昌主尚存
話到孝純能識面抱來太子輒呼名六宮都講家人禮
四節頻加戚里恩同謝面脂龍德殿共乘油壁月華門
萬事榮華有消歇樂安一病音容沒莞弱桃笙朝露空

溫明祕器空堂設玉房珍玩宮中賜遺言上獻依常制
却添駙馬不勝情至尊覽表為流涕金冊珠衣進太妃
鏡奩鈿合還夫壻此時同產更無人寧德來朝笑語真
憂及四方宵旰甚自家兄妹話艱辛明年鐵騎燒宮闕
君后倉黃相訣絕仙人樓上看灰飛織女橋邊聽流血
慷慨難從鞏公死亂離怕與劉郎別扶攜夫婦出兵間
改朔移朝至今活粉碓脂田縣吏收糶樓舞閣豪家奪
曾見天街羨璧人今朝破帽迎風雪賣珠易米返柴門

貴主淒涼向誰說苦憶先皇涕淚連長平嬌小最堪憐
青萍血碧它生果紫玉魂歸異代緣盡嘆周郎曾入選
俄驚秦女遽登仙青青寒食東風柳彰義門邊冷墓田
昨夜西窓仍夢見樂安小妹重歡讌先后傳呼喚捲簾
貴妃笑折櫻桃倦玉階露冷出宮門御溝春水流花片
花落回頭往事非更殘燈炮淚沾衣休言傳粉何平叔
莫見焚香衛少兒何處笙歌臨大道誰家陵墓對斜暉
只看天上瓊樓夜烏鵲年年它自飛

董山兒

董山兒兒生不識亂與離父言急去牽兒衣母言乞火
為兒炊作糜父母忽不見但見長風白浪高崔嵬將軍
下一令軍中那得聞兒啼樓船何高高沙岸多崩摧榜
人不能移舉手推墮之上有蒲與萑下有濘與泥十步
九倒迷東西身無袴襦足穿蔌藜叩頭指口惟言飢將
船送兒去問以鄉里記憶還依稀父兮母兮哭相認聲
音雖是形骸非傍有一老翁羨兒獨來歸不知我兒何

處餵游魚或經略賣遭鞭笞垂頭涕下何累累吾欲竟
此曲此曲哀且悲茫茫海內風塵飛一身不自保生兒
欲何為君不見董山兒

梅村集卷五

欽定四庫全書

梅村集卷六

國子監祭酒吳偉業撰

七言古詩三

送沈繹堂太史之官大梁

雲間學士推二沈布衣名見登華省多少金
閨榜墨新科名埋沒聲華冷青史流傳有弟兄
衣白山人披賜錦一代才名並玉珂百年絹素垂金粉
知君門胄本能文

易世遭逢更絕倫射策紫裘臚唱出馬蹄不動六街塵
曲江李杜無遺恨留取花枝待後人即今藝苑多供奉
八分草隸清曹重署額新宮十丈懸韋郎體勢看飛動
其餘作者何紛紛爭來待詔鴻都門圍棋賭墅王長史
丹青畫馬曹將軍君也讀書致上第傳家翰墨閒游戲
迸落長空筆陣奇縱橫妙得先人意頓挫沉雄類壯夫
雙瞳剪水清癯異卧疾蕭齋好苦吟平生雅不為身計
唯留詩句滿長安清切長宜禁近官秋雨直廬分手處

忽攜書卷看嵩山
嗚呼男兒不入即當出生世諧為二
千石黃紙初除左馮翊
腰間兩綬開顏色君不見沈侍
中圖書秘閣存家風
匹夫徒步拜侍從
況今淋漓

御墨宮袍紅一麾去
聽梁園鐘軒車路出繁臺東
杯酒意氣何雍容
簿領豈足羞英雄
安能低眉折腰事鉛槧

蹉跎白首從雕蟲

宣廟時雲間有大小沈學士以布衣
善書入翰林皆著名跡大學士名度

小學士名聚繹堂為壬辰第三人官編
脩擢授大梁道亦有書名小學士後也

通玄老人龍腹竹歌

通玄老人來何方碧壚賴面拳毛蒼手披地圖向我說
指點西極天微茫視彼萬里若咫尺使我不得悲他鄉
京師公卿誰舊識與君異國同周行九州喪亂朋友盡
此道不絕留扶桑床頭示我龍腹竹夜半風雨疑騰驤
尾燒鱗蛻飛不得蒼皮倔強膺微張此中空洞亦何有
得無頷下驪珠藏漢家使者通大夏仍來叩蜀搜篋簞
更踰葱嶺訪異種攜歸上苑棲鸞皇我欲裁之作龍笛
水底老蛟吟不得縱使長房投葛陂此龍僵卧難扶策

可是天教產竹郎八荒奇事誰能識一從海上西南來
中原篠蕩多良材淇園已竭蒼生痛會稽正採征夫哀
天留異質在無用任將拋擲生塵埃若有人兮在空谷
束素娟娟不盈匊盡道腰肢瘦勝肥此君無乃非其族
雪壓霜欺直幹難輪囷偃蹇忘榮辱邴君豈出子魚下
高人磊砢遭題目玉筍新抽漸拂雲摩挲自倚東牆曲
苦節長同處士飢寬心好耐湘妃哭吁嗟乎崑崙以外
流沙西當年老子驅青犢手中竹杖插成林殺青堪寫

遺經讀君不見猶龍道德五千字要言無過寧為腹何
可一日無此竹

送舊總憲龔孝升以上林苑監出使廣東

與君對酒庾樓月君逼干戈我離別與君藉地燕山草
君作公孤我潦倒亦知窮老應自疎識君意氣真吾徒
門前車馬多豪俊躡衣上坐容衰鬢我持半勺君一斗
我吟一篇君百首每逢高會輒盡歡把我新詩不容口
今日他鄉再送君地角天涯復何有山川有靈交有命

延津會合真難定如君共事曹侍郎百僚彈壓風裁正
握手論文海內推交游京洛聲華盛秋風吹向越王臺
後先踪跡誰能信不見蘭臺連柏府却過劍浦來珠郡
相贈雖無陸賈金相看何必周昌印丈夫豁達開心期
悠悠世上無人知三仕三已總莫問一貴一賤將奚為
別君勸君休失意碧水丹山暫遊戲客路扁舟好著書
故園九日堪沉醉烏桕霜紅少婦樓枕柳雨黑行人騎
獨有飄零老伏生不堪衰白困將迎祇因舊識當塗少

坐使新知我輩輕花發羅浮夢君處躑躅悲歌不能去

雁門尚書行

并序

雁門尚書行為大司馬白谷孫公作也公代州
人地故雁門郡長身伉爽才武絕人其用秦兵
也將憑嚴關為持久且固將吏心秦士大夫弗
善也累檄趣之戰不得已始出天淫雨糗糧不
繼師大潰潼關陷獨身橫刀衝賊陣以沒從騎
俱散不能得其屍公之出也自念必死顧語張

夫人夫人曰丈夫報國耳無憂我西安破率二
女六妾沉于井揮其八歲兒以去兒踰垣避賊
墮民舍中有老翁者善衣食之二年公長子世
瑞重趼入秦得夫人屍貌如生老翁歸以弟相
扶還見者泣下蓋公素有德秦人云余門人馮
君訥生公同里人作潼關行紀其事余曾識公
于朝因感賦此什公死而天下事以去然其敗
由趣戰且大雨糧絕此固天意抑本廟謨未可

專以責公也公之叅佐惟監軍道喬公以明經
奏用能不負公潼關之破同日死名元柱定襄

人

雁門尚書受專征登壇顧盼三軍驚身長八尺左右射
坐上咄吒風雲生家居絕塞愛死士一日費盡千黃金
讀書致身取將相關西鼠子方縱橫長安城頭揮羽扇
卧甲韜弓不忘戰持重能收壯士心沉幾好待兇徒變
忽傳使者上都來夜半星馳馬流汗覆轍寧堪似往年

催軍還用松山箭尚書得詔初沉吟蹶起橫刀忽長歎
我今不死非英雄古來得失誰由算椎牛誓衆出潼關
墟落蕭條轉餉難六月炎蒸驅萬馬二嶠風雨斷千山
雄心慷慨宵飛檄殺氣憑陵老據鞍掃箠謀成頻撫劒
量沙力盡為傳滄尚書戰敗追兵急退守巖關收潰卒
此地乘高足萬全只今天險嗟何及蟻聚蜂屯已入城
持矛瞋目呼狂賊戰馬嘶鳴失主歸橫尸撐距無能識
烏鳶啄肉北風寒寡鵠孤鸞不忍看願逐相公忠義死

一門恨血土花斑故園有子音書絕勾注烽烟路百盤
欲走雲中穿紫塞別尋奇道訪長安長安到日添悲哽
繭足荆榛見智井轆轤繩斷野苔生幾尺枯泉浸形影
永夜曾歸風露清經秋不化冰霜冷二女何年駕碧鸞
七姬無塚埋紅粉複壁藏兒定有無破巢窮鳥問將雛
時來作使十兵勢運去流離六尺孤傍人指點牽衣袂
相看一慟真吾弟訣絕難為老母心護持始識遺民意
回首潼關廢壘高知公于此葬蓬蒿沙沉白骨魂應在

雨洗金瘡恨未消渭水無情自東去殘鴉落日藍田樹
青史誰人哭蘇碑赤眉銅馬知何處嗚呼材官鐵騎看
如雲不降即走徒紛紛尚書養士三十載一時同死何
無人至今唯說喬參軍

贈馮訥生進士教授雲中

并州馮郎長吳越桐江風雪秦淮月不烹羊酪敵蓴羹
肯拈蘆管吹桃葉才同顧陸與溫邢俠少風流擅絕倫
名士有誰甘作諾丈夫何必尚專城乞得一氊還故土

欲化邊人作鄒魯余笑謂君且歸去不信廣文今廣武
絳帳懸弓設豹侯講堂割肉撾鼉鼓擊磬新調塞上歌
投壺却奏軍中舞文籍先生上谷儒游閒公子河東賈
亂定初聞闕里鐘時清不用平城弩雁門太守解將迎
馬邑名豪通訓詁烏桓年少挾雕弧射得黃羊供束脯
男兒作健羞裙屐拂雲堆上吹橫笛低頭博士為萬卷
撫掌封侯空四壁憶昔扁舟醉石頭別來幾夢南徐客
隱囊麈尾燒却盡長鋏純鉤看自惜學就吳趨恐未工

注成晉問無人識嗚呼五湖烟水憶鱸魚落木天高好
寄書塞雁不歸花又發故人消息待何如

雕橋莊歌

并序

高邑趙忠毅公為雕橋莊記曰吾郡梁太宰有
雕橋莊在郡西十五里大茂諸山之東前臨滹
沱西韓二水東為大門表之曰尚書里有樓曰
蓮渚仙居有堂曰壽槐槐可四十圍相傳數百
年物太宰功成身退徜徉于此者二十年今其

孫慎可讀書其中自號為西韓生云此忠毅家
居時所作也公後拜吏部尚書視梁公以同郡
為後繼竟因黨禍戍代州死慎可以孝廉入中
翰余始識之知其為趙公交尋以齟齬去相別
十餘年今起官水部家門蟬冕當代莫與比焉
余以其名山別墅亂後獨全高門遺老晚節最
勝雕橋盛事自太宰以來百餘年於此矣是可
歌也為作雕橋莊歌

常山古槐千尺起雕橋西畔尚書里偃蓋青披大茂雲
扶疎響拂韓河水水部山莊遶碧渠彈琴長嘯脩篁裏
今年相見在長安據鞍却笑吾衰矣盡道新枝任棟梁
不知老幹經風雨自言年少西韓生幽并豪俠皆知名
酒酣箕踞聽鼓瑟射麋擊兔邯鄲城天生奇質難自棄
一朝折節傾公卿當時海內推高邑趙公簡重稱相得
才地能交大父行襟期雅負名賢識公曾過我讀書處
笑倚南樓指庭樹歸田太宰昔同游廿載林泉共來去

此是君恩優老臣後來吾輩應難遇每思此語輒泣然
知己投荒絕塞天同是冢臣思數異傷心非復定陵年
黃巾從此成貽禍青史誰來問斷編鉤黨幾家傳舊業
干戈何地着平泉我有山莊幸如故老樹吟風自朝暮
磐石寧容蟲蟻穿斧斤不受樵蘇誤鈴索高齋擁賜書
名花異果雕欄護綠萼紅渠水面開門前即是鳴騶路
子弟傳呼千騎歸不教鞍馬驚鷗鷺年年細柳與新蒲
粧點溪山入畫圖四海烽烟喬木在一窓燈火故人無

相逢只有江南客頭白尊前伴老夫

海戶曲

南海子周環一百六十里有海戶千人

大紅門前逢海戶衣食年年守環堵收藁腰鎌拜嗇夫
築場貫酒從樵父不知占籍始何年家近龍池海眼穿
七十二泉長不竭御溝春暖自涓涓平疇如掌催東作
水田漠漠江南樂駕鶯鶯鶻滿烟汀不枉人呼飛放泊
南海子有水泉七十二處元之飛放泊也後湖相望築三山兩地神州咫尺
間以西苑後湖名海子故此云南遂使相如誇陸海肯教王母笑桑田

蓬萊樓閣雲霞變，瞭鷹臺上何王殿。

瞭鷹臺元之仁虞院也，常使大學士

提調之鷹墜皆用先朝舊璽改作

傳說新羅玉海青，星眸雪爪飛如練。

玉海青即白鷹也

詐馬筵開，酒香

元有詐馬宴

割鮮夜飲，仁虞院

二百年來話大都，平生有眼何曾見。頭白經過是舊朝，

春深慣鎖黃山苑。

叶

典守唯聞中使來，樵蘇輒假貧民

便。芳林別館百花殘，廿四園中爛漫看。

南海子有二十四園，係明時制

記得上方初薦品，東風鈴索護雕欄。葡萄滿摘傾筠籠，

蘋果新嘗捧玉盤。賜出宮中公主謝，分遺闕下侍臣餐。

一朝剪伐生荆杞五柞長楊悵已矣野火風吹螞蟻墳

海子東南有螞蟻墳每清明日數萬皆聚于此

枯楊月落蝦蟇水

王泉一名蝦蟇泉流入海

子盡道千年苑囿非忽驚萬乘車塵起雄圖開國馬蹄

勞將相風雲劍掣高帳殿行程三十里旌旗獵獵響鳴

鞘朝鮮使者奇毛進白鷹刷羽霜天勁舊跡凌歊好放

鵬荒臺百尺登臨勝俊鶻重經此地飛黑河講武當年

盛弔古難忘百戰心掃空雉兔江山淨新豐野老驚心

目縛落編籬守麋鹿兵火摧殘淚滿衣昇平再覩修茅

屋衰草今成御宿園豫游只少千章木上林丞尉已連
催灑掃離宮補花竹人生陵谷不須哀蘆葦陂塘雁影
來君不見鄠杜西風蕭瑟裏丹青早起濯龍臺

退谷歌

贈同年孫
公北海

我家乃在莫壑之下具區之東洞庭烟鬟七十二天際
杳杳聞霜鐘豈無巢居子長嘯呼赤松後來高卧不可
得無乃此世非洪濛元氣茫茫鬼神鑿黃虞既沒巢由
窮逆旅逢孫登自稱北海翁攜手共上徐無峰仰天四

顧指而笑此下即是宜春宮若教天子廣苑囿吾地應
入甘泉中丈夫蹤跡貴狡獪何必萬里游崆峒君不見
抱石沉楚山死被髮佯狂棄妻子匡廬峰成都市欲逃
名姓竟誰是少微無光客星暗四皓衣冠只如此使我
山不得高水不得深鳥不得飛魚不得沉武陵洞口聞
野哭蕭斧斫盡桃花林仙人得道古來宅劫火到處相
追尋不如三輔內此地依青門非朝非市非沉淪鄠杜
豈關蕭相請茂陵不厭相如貧飲君酒就君宿羨君逍

遙之退谷花好須隨禁苑開
泉清不讓溫湯浴中使敲
門為放鷹羽林下馬因尋
鹿我生亦胡為白頭苦碌碌
送君還山識君屋庭草彷彿
江南綠客心歷亂登高目
噫噫乎歸哉我家乃在莫釐
之下具區之東側身長望
將安從

贈文園公

君家丞相人中龍屈伸時會
風雲空廬陵忠孝兩賢繼
待詔聲名累葉同致主絲綸
三月罷傳家翰墨八分工

汝父翩翩相公弟詞場跌宕酣聲伎才大非關書畫傳
門高不屑公卿貴老向長安作布衣主知特達金門戲
先帝齋居好鼓琴相如召入賜黃金大絃張急宮聲亂
識是君王宵旰心為君既難臣亦苦龜山東望思宗魯
左徒憔悴放江潭忠愛惓惓不忘楚可惜吾家有逐臣
曲終哀怨無人補欲譚治道將琴諫審音先取宮商辨
怡神玉几澹無為雲門樂作南薰殿君臣朋友盡和平
四海熙然致清晏聖主聞聲念舊臣名家絕藝嗟稱善

歸來卧疾五湖雲垂死干戈夢故君綠綺暗塵書卷在
春令原上戴顓墳雍門歌罷平陵曲報韓子弟幾湛族
竺塢祠堂鬼火紅閭門池館蒼颯宿汝念先人供奉恩
抱琴長向荒江哭滿目雲山入舊圖只今無地安茅屋
誰將妙蹟享千金後人餒死空山麓與君五世通中表
相國同朝悲宿草尋山結伴筍輿游汝父平生與我好
看君才調擅丹青畫舫相逢話死生君不見信國悲歌
青史裏古來猶子重家聲

畫中九友歌

華亭尚書天人流墨花五色風雲浮至尊含笑黃金投

殘膏剩馥鷄林求

玄宰

太常妙蹟兼銀鉤樂郊擁卷高

堂秋真宰欲訴窮雕搜解衣盪礴堪忘憂

烟客

誰其匹

者王廉州神姿玉樹三山頭擺落萬象烟霞收尊彝斑

剝探商周得意換却千金裘

元照

檀園著述誇前脩丹

青餘事追營丘平生書畫置兩舟湖山勝處供淹留

長

衛

阿龍北固持雙矛披圖赤壁思曹劉酒醉灑墨橫江

樓蒜山月落空悠悠

龍友

姑蘇太守今僧繇問事不省

張兩眸振筆忽起風颼颼連紙十丈神明遒

爾唯

松圓

詩老通清謳墨莊自畫歸田游一犁黃海鳴春鳩長笛

倒騎烏犢牛

孟陽

花龕巨幅千峰稠小景點出林塘幽

晚年筆力凌滄洲幅巾鶴髮輕王侯

潤甫

風流已矣吾

瓜疇一生迂癖為人尤僮僕竊罵妻孥愁瘦如黃鵠閒

如鷗烟驅墨染何曾休

僧彌

銀泉山

銀泉山下行人稀青楓月落魚燈微道旁翁仲忽聞語
火入空墳燒寶衣五陵小兒若狐兔夜穴紅墻縣官捕
玉腕珠襦散草間云是先朝鄭妃墓覆雨翻雲四十年
專房共輦承恩顧禮數繇來母后殊至尊錯把旁人怒
承直中宮侍宴迴血裏銀環不知數豈有言辭忤大家
蛾眉薄命將身悞宮人斜畔伯勞啼聲聲為怨驪姬訴
盡道昭儀殉夜臺萬歲千秋共朝暮宮車一去不相隨
當時枉信南山銅只今雲母似平生皓齒明眸向誰妬

選侍陵園亦已荒移宮事蹟更茫茫兩朝臺諫孤忠在
一月昭陽舊恨長總為是非留信史却憐恩寵異前王
路人尚說東西李

二李宸園亦在山下

指點飛花入壞墻

田家鐵獅歌

田家鐵獅屹相向舐舐躡夷信殊狀良工朱火初寫成
四顧咨嗟覺神王先朝異物徠西極上林金鎖攀楹出
玉關罷獻獸圈空刻畫丹青似爭力武安戚里起高門
欲表君恩示子孫鑄就銘詞鐫日月天貽神獸守重關

第令監奴睛閃爍老熊當路將人攫不堪此子更當關
鉤爪張眸吐銀齧七寶香猊玉辟邪嬉游牽伴入侯家
圉人新進天閑馬御賜仍名獅子花假面羗胡裝雜伎
狡猊突出拳毛異跳擲聲聲畫鼓催條支海上何繇致
異材逸獸信超羣其氣無乃如將軍將軍豈是批熊手
瞋目哮呼天下聞省中忽唱田蚡死青犢明年食龍子
蝦蟇血灑上陽門三十六宮土花紫此時鐵獅絕可憐
兒童牽挽誰能前橐駝磨肩牛礪角霜催雨蝕枯藤纏

主人已去朱扉改眼鼻塵沙經幾載鎖鑰無能護北門
畫圖何處歸西海吾聞滄洲鐵獅高數丈千年猛氣難
凋喪風雷夜半戲人間柴皇戰伐英靈壯蘆溝城雉對
西山橋上征人竟不還枉刻蹲獅七十二桑乾流水自
潺潺秋風吹盡連雲宅鐵鳳銅烏飛不得却羨如來有
化城香林獅象空王力扶崔犛牛見太平月支使者貢
西京并州精鐵終南冶好鑄江山莫鑄兵

題崔青蚓洗象圖

嗚呼顧陸不可作世間景物都蕭索雲臺冠劍半無存
維摩寺壁全凋落開元名手空想像昭陵御馬通泉鶴
燕山崔生何好奇書畫不肯求人知仙靈雲氣追恍惚
宓妃雛女乘龍螭平生得意圖洗象興來掃筆開屏障
赤罽如披洱海裝白牙似立含元仗當時駕幸承天門
鸞旗日月陳金根雞鳴鐘動雙闕下巋然不動如崑崙
崔生布衣懷紙筆道衝騶哄金吾卒仰見天街馴象來
歸去沉吟思十日眼前突兀加摩娑非山非屋非陂陀

昔聞阿難騎香象栴檀林內頻經過我之此圖無乃是
貝多羅樹金沙河十丈黃塵向天闕霜天夜踏宮墻月
芻豆支來三品料鞭梢趨就千官謁材大寧堪世人用
徒使低頭受羈紲京師風俗看洗象玉河春水涓流潔
赤脚烏蠻縛雙帚六街士女車填咽叩鼻殷成北闕雷
怒蹄捲起西山雪圖成懸在長安市道旁觀者呼奇絕
性癖難供勢要求價高一任名豪奪十餘年來人事變
碧雞金馬爭傳箭越人善象教象兵扶南身毒來酣戰

惜哉崔生不復見
畫圖未得開生面
若使從軍使趙佗
蒼梧城下看如練
更作昆明象戰圖
止須一疋鷲溪絹
嗟嗟崔生餓死長
安陌亂離荒草埋
殘骨一生心力付
兵火此卷猶存堪
愛惜君不見武宗
供奉徐髯仙豹房
夜直從游畋青熊
蒼兕寫奇特至尊
催賜黃金錢只今
零落同雲烟古來
畫家致身或將相
丹青慘澹誰千年

松山哀

拔劍倚柱悲無端
為君慷慨歌松山
盧龍蜿蜒東走欲

入海屹然撐拄當雄關連城列障去不息茲山突兀烟
峰攢中有壘石之軍盤白骨撐距凌巘岼十三萬兵同
日死渾河流血增奔湍豈無遭際異變化須臾間出身
憂勞致將相征蠻建節重登壇還憶往時舊部曲喟然
歎息摧心肝嗚呼玄菟城頭夜吹角殺氣軍聲振寥廓
一旦功成盡入關錦裘跨馬征夫樂天山回首長蓬蒿
烟火蕭條少耕作廢壘斜陽不見人獨留萬鬼填寂寞
若使山川如此閒不知何事爭強弱聞道

朝廷念舊京詔書招募起春耕兩河少壯丁男盡三輔
流移故土輕牛背農夫分部送雞鳴關吏點行頻早知
今日勞生聚可惜中原耕戰人

臨淮老妓行

臨淮將軍擅開府不鬪身強鬪歌舞白骨何如棄戰場
青娥已自成灰土老大猶存一妓師柘枝記得開元譜
纔轉輕喉便淚流尊前訴出漂零苦妾是劉家舊主謳
冬兒小字唱梁州翻新水調教桃葉撥定鷗絃授莫愁

武安當日誇聲伎秋娘絕藝傾時世戚里迎歸金犢車
後來轉入臨淮第臨淮游俠起山東帳下銀箏小隊紅
巧笑射棚分畫的濃粧毬仗簇花叢縱為房老腰肢在
若論軍容粉黛工羊侃侍兒能走馬李波小妹解彎弓
錦帶輕衫嬌結束城南挾彈貪馳逐忽聞京闕起黃塵
殺氣奔騰滿川陸探騎誰能到薊門空聞千里追風足
消息無憑訪兩宮兒家出入金張屋請為將軍走故都
一鞭夜渡黃河宿暗穿敵壘過侯家妓堂仍訝調絲竹

祿山裨將帶弓刀醉擁如花念奴曲倉卒逢人問二王
武安妻子相持哭薰天貴勢倚椒房不為君王收骨肉
翻身歸去遇南兵退駐淮陰正拔營寶劍幾曾求死士
明珠還欲致傾城男兒作健酣杯酒女子無愁發曼聲
可憐西風怒吹折山陽樹將軍自撤沿淮戍不惜黃金
購海師西施一舸東南避鬱洲崩浪大於山張帆捩柁
無歸處重來海口豎降幡全家北過長淮去長淮一去
幾時還誤作王侯邸第看收者到門停奏伎蕭條西市

嘆南冠老婦今年頭總白淒涼閱盡興亡迹已見秋槐
隕故宮又看春草生南陌依然絲管對東風坐中尚識
當時客金谷田園化作塵綠珠子弟更無人楚州月落
清江冷長笛聲聲欲斷魂

殿上行

殿上雲旗天半出夾陛無聲手攀直有旨傳呼召集賢
左右公卿少顏色公卿繇來畏廷議上殿叩頭輒心悸
吾丘發策詘平津未斥齊人慚汲尉先生侍從垂金魚

退直且上庖西書況今慷慨復遑惜不爾何以乘朝車
秦涼盜賊雜風雨梁宋丘墟長沮洳降人數部花門留
抽騎千人桂林戍至尊宵旰誰分憂挾彈求鳳高墉謀
老臣自詣都詔獄逐客新辭鳩鵲樓先生翻然氣填臆
口讀彈文叱安石期門將軍鬚戟張側足聞之退股栗
吾聞孝宗宰執何其賢劉公大夏戴公珊夾城日移對
便殿造膝密語為艱難如今公卿習唯唯長跪不言而
已矣黃絲歷亂朱絲直秋蟲跼曲秋雕起嗚呼拾遺指

佞乃史臣優容愚戇天王仁

過錦樹林玉京道人墓

并傳

玉京道人莫詳所自出或曰秦淮人姓卞氏知
書工小楷能畫蘭能琴年十八僑虎丘之山塘
所居湘簾槩几嚴淨無纖塵雙眸泓然日與佳
墨良紙相映徹見客初亦不甚酬對少焉諧謔
間作一坐傾靡與之久者時見有怨恨色問之
輒亂以他語其警慧雖文士莫及也與鹿樵生

一見遂欲以身許酒酣拊几而顧曰亦有意乎
生固為若弗解者長歎凝睇後亦竟弗復言尋
遇亂別去歸秦淮者五六年矣久之有聞其復
東下者主於海虞一故人生偶過焉尚書某公
者張具請為生必致之衆客皆停杯不御已報
曰至矣有頃迴車入內宅屢呼之終不肯出生
悵怏自失殆不能為情歸賦四詩以告絕已而
歎曰吾自負之可奈何踰數月玉京忽至有婢

曰柔柔者隨之嘗著黃衣作道人裝呼柔柔取
所攜琴來為生鼓一再行泣然曰吾在秦淮見
中山故第有女絕世名在南內選擇中未入宮
而亂作軍府以一鞭驅之去吾儕淪落分也又
復誰怨乎坐客皆為出涕柔柔莊且慧道人畫
蘭好作風枝婀娜一落筆盡十餘紙柔柔承侍
硯席間如弟子然終日未嘗少休客或導之以
言弗應與之酒弗肯飲踰兩年渡浙江歸於東

中一諸侯不得意進柔柔奉之乞身下髮依良
醫保御氏於吳中保御者年七十餘侯之宗人
築別宮資給之良厚侯死柔柔生一子而嫁所
嫁家遇禍莫知所終道人持課誦戒律甚嚴生
於保御中表也得以方外禮見道人用三年力
刺舌血為保御書法華經既成自為文序之緇
素咸捧手讚歎凡十餘年而卒墓在惠山祇陀
菴錦樹林之原後有過者為詩弔之曰

龍山山下茱萸節，泉響琤淙流不竭。但洗鉛華不洗愁，
形影空潭照離別。離別沈吟幾迴顧，遊絲夢斷花枝悟。
翻笑行人怨落花，從前總被春風誤。金粟堆邊烏鵲橋，
玉孌湖上薜蘿路。油壁曾聞此地遊，誰知即是西陵墓。
烏柏霜來映夕曛，錦城如錦葬文君。紅樓歷亂燕支雨，
繡嶺迷離石鏡雲。絳樹草埋銅雀硯，綠翹泥浣鬱金裙。
居然設色倪迂畫，點出生香蘇小墳。相逢盡說東風柳，
燕子樓高人在否。枉拋心力付蛾眉，身去相隨復何有。

獨有瀟湘九畹蘭幽香妙結同心友十色箋翻貝葉文
五條絃拂銀鈎手生死梅檀祇樹林青蓮舌在知難朽
良常高館隔雲山記得斑駁嫁阿環薄命只應同入道
傷心少婦出蕭關紫臺一去魂何在青鳥孤飛信不還
莫唱當時渡江曲桃根桃葉向誰攀

悲滕城

悲滕城滕人牧羊川之濱雨工矯步趨其羣河魚大上
從風雲去山一尺雷殷殷寺前鐵鐸多死聲日暮雞犬

慘不鳴城上掌事報二更鬼馬踏霧東南行鼓音隆隆
非甲兵吁嗟龍伯何不仁大水湯湯滔吾民城中竿瑟
不復陳縞帶之價高錦純路骨藉藉無主名葬者死生
俱未明悲滕城滕城訛言晝夜驚百尺危巖浮車輪海
民投網獲釜鑄巫兒赤章賽水神溝人匠氏脩防門

打水詞

北河風高水生骨玉壘銀橋堆幾尺新戍雲中千騎馬
橫津直渡無行迹下流湍悍川途開吹笳官舫從南來

帆檣山齊排浪進牽船百丈聲如雷雪深沒髀衣露肘
背挽頭低風塞口相逢羨殺順流船急問來時河凍否
溜過湖寬放棹平長年穩望一帆輕夜深側聽流漸響
瑣碎玲瓏漸結成篙滑難施櫓枝折舟人霜滿髭鬚白
發鼓催船喚打水衝寒十指西風裂吁嗟河伯何磴磴
白楮如雨終無聲魚龍潛逃科斗匿殊耐鞭杖非窮民
官艙裘酒自高卧只話篙師叉手坐早辦人夫候治裝
明日推車冰上過

再觀打水詞


官催打水不肯行
座船既泊商船停
商船雖住起潛聽
冰底有聲舵牙應
桅竿旗動吹南風
舟子喜甚呼蒙衝
兒童操艇爭跳躍
其氣早奪馮夷宮
砮如蒼崖崩巨石
鉤如戈矛相撞擊
淪如雲氣騰虛空
颯如雨聲飛浙瀝
河伯娶婦三日眠
霜紈方空張輕烟
忽聞裂帛素娥笑
玉盤銀甕傾流泉
別有鮫鮪還未醒
沉魚浮藻何隱隱
上冰猶結下水行
視水如燈取冰影
冰輪既展相催送

三千練甲皆隨從激岸迴湍水負冰白龍十丈鱗鱗動
自古水嬉無此觀披裘起坐捲簾看估客兼程貪夜發
却愁明日西風寒枕畔輕雷殊不已醉裏扁舟行百里
安得并州第四絃彈徹冰天霜月起

雪中過獵

北風雪花大如掌河橋路斷流澌響愁鴟餓雀語啁啾
健鶻奇鷹姿颯爽將軍射獵城南隅軟裘快馬紅氍毹
秋翎垂頭西鼠煖鴉青徑寸裝明珠金鵝箭褶袍花濕

桐酒駝羹馬前立錦靴玉貌撥秦箏瑟瑟鬟多好顏色
少年家住賀蘭山碛裏擒生夜往還鐵嶺草枯燒堠火
黑河水滿渡征鞍十載功成過高柳閒却平生射鵰手
漫唱千人勅勒歌只傾萬斛屠蘇酒今朝彷彿李陵臺
將軍喜甚圍場開黃羊笑過笑追射鼻端出火聲如雷
回去朱旗滿城闕不信溝中凍死骨猶有長征遠戍人
哀哀萬里交河卒笑我書生短褐溫寒驢箸笠過前村
即今莫用梁園賦扶杖歸來自閉門



梅村集卷六

欽定四庫全書

集部

梅村集卷八

詳校官內閣中書臣陸湘

助教臣常循覆勘

總校官知縣臣楊懋珩

校對官中書臣程琰

謄錄監生臣程世英

欽定四庫全書

梅村集卷七

國子監祭酒吳偉業撰

七言古詩四

曇陽觀訪文學博士石蕪讀蒼雪師舊跡有感

先生頭白髮垂耳
博士無官家萬里
講席漂零笠澤雲
鄉心斷絕昆明水
南來道者為蒼公
說經如虎詩如龍
大渡河頭洗白足
一枝柳栗樓中峰
與君相見晀然笑

石床對語羈愁空故園西境接身毒雪山照耀流沙通
神僧大儒却並出雕題久矣漸華風嗚呼銅鼓鳴莊蹻
起青草湖邊築營壘金馬碧雞悵已矣人言堯幽囚或
言舜野死目斷蒼梧淚不止吾州城南祠仙子窈窕丹
青映圖史玉棺上天人不見遺骨千年蛻于此先生結
茅居其傍歸不歸兮思故鄉盡道長沙軍已得滇池王
伏波南下開夜郎烏爨孤城猶屈強青蛉絕塞終微茫
忽得山中書蒼公早化去支遁經臺樹隕花文翁書屋

風飄絮噫嘻乎悲哉香象歸何處杜宇啼偏哀月明夢
落桄榔臺大夫行年已七十天涯戎馬知何日點蒼青
洱海白道路雖開亦無及

贈陸生

陸生得名三十年布衣好客囊無錢尚書墓道千章樹
處士江邨二頃田京華浪跡非長計青藥求名總游戲
習俗誰容我棄捐才名苦受人招致古來權要嗜奔走
巧借高賢謝多口古來貧賤難自持一飡誤喪生平守

陸生落落真吾流行年五十今何求好將輕俠藏亡命
耻把文章謁貴游丈夫肯用他途進相逢誤喜知名姓
狡獪原來達士心棲遲不免文人病黃金白壁誰家子
見人盡道當如此銅山一旦拉然崩却笑黔婁此中死
嗟君時命劇可憐蜚語牽連竟配邊木葉山頭悲夜夜
春申浦上望年年江花江月歸何處燕子鶯兒等飄絮
紅豆啼殘曲裏聲白楊哭斷齋前樹屈指鄉園荀蒨肥
南烹置酒夢依稀萐鱸正美書堪寄燈火將殘淚獨揮

君不見鴻都買第歸來客駟馬軒車胡辟易西園論價
喜誰知東觀掄文矜莫及從他羅隱與方干不比如君
行路難只有一篇思舊賦江關蕭瑟幾人看

吾谷行

吾谷千章萬章木挿石緣溪秀林麓中有雙株向背生
並幹交柯互蟠曲一株夭矯面東風上拂青雲宿黃鵠
黃鵠引吭鳴一聲響入瑤花飛簌簌一株偃蹇踞陰崖
半死半生遭屈辱雷劈燒痕翠鬣焦雨垂漏滴蒼皮縮

泥崩石斷迸枯根鼠竄蟲穿隱空腹行人過此盡彷徨
日暮驅車不能速前山路轉相公墳宰木參差亂入雲
枝上子規啼碧血道旁少婦泣羅裙羅裙碧血招魂哭
寡鵠羈雌不忍聞同伴幾家逢下淚羨他夫壻尚從軍
可憐吾谷天邊樹猶有相逢斷腸處得免倉黃剪伐愁
敢辭漂泊風霜懼木葉山頭雪正飛行人十月遼陽戍
兄在長安弟玉關摘葉攀條不能去昨宵有客大都來

傳道

君王幸漸臺便殿含毫題

詔溼閣門走馬報花開宮槐聽取從官詠御柳催成應
制才定有春風到吾谷故園不用憂樵牧雖過彫枯墜
葉黃恰逢滋茂攢條綠由來榮落總何常莫向千門羨
棟梁君不見庾信傷心枯樹賦縱吟風月是他鄉

圓圓曲

鼎湖當日棄人間破敵收京下玉關慟哭六軍俱縞素
衝冠一怒為紅顏紅顏流落非吾戀逆賊天亡自荒謫

電掃黃巾定黑山哭罷君親再相見相見初經田竇家
侯門歌舞出如花許將戚里莖篴伎等取將軍油壁車
家本姑蘇浣花里圓圓小字嬌羅綺夢向夫差苑裏游
宮娥擁入君王起前身合是採蓮人門前一片橫塘水
橫塘雙槳去如飛何處豪家強載歸此際豈知非薄命
此時只有淚沾衣薰天意氣連宮掖明眸皓齒無人惜
奪歸永巷閑良家教就新聲傾坐客坐客飛觴紅日暮
一曲哀絃向誰訴白晳通侯最少年揀取花枝屢迴顧

早攜嬌鳥出樊籠待得銀河幾時渡恨殺軍書底死催
苦留後約將人誤相約思深相見難一朝蟻賊滿長安
可憐思婦樓頭柳認作天邊粉絮看遍索綠珠園內第
強呼絳樹出雕欄若非壯士全師勝爭得蛾眉匹馬還
蛾眉馬上傳呼進雲鬟不整驚魂定蠟炬迎來在戰場
啼粧滿面殘紅印專征簫鼓向秦川金牛道上車千乘
斜谷雲深起畫樓散關月落開粧鏡傳來消息滿江鄉
烏相紅經十度霜教曲妓師憐尚在浣紗女伴憶同行

舊巢共是銜泥燕飛上枝頭變鳳皇長向尊前悲老大
有人夫婿擅侯王當時祇受聲名累貴戚名豪競延致
一斛明珠萬斛愁關山漂泊腰肢細錯怨狂風颺落花
無邊春色來天地嘗聞傾國與傾城翻使周郎受重名
妻子豈應關大計英雄無奈是多情全家白骨成灰土
一代紅粧照汗青君不見館娃初起鴛鴦宿越女如花
看不足香逕塵生鳥自啼廡廊人去苔空綠換羽移宮
萬里愁珠歌翠舞古梁州為君別唱吳宮曲漢水東南

日夜流

送杜大子皇從婁東往武林兼簡曹司農秋岳范

僉事正

五月江村客行曉
僮無朝餉馬無草
路穿槐柳到柴門
滿架藤花屋灑掃
與君相別定何年
一見嗟余頭白早
東鄰濁酒賒未到
盤格簾疎具梨棗
莫怪貧家一飯難
主人長饑客不飽
解囊示我金焦詩
四壁波濤驚欲倒
一氣元音接混茫
想落千峰入飛鳥
近來此地擅時譽

粉飾開元與天寶我把耒鋤倦唱酬恥畫蛾眉鬪工巧
看君爽氣出江山始悔從前作詩少海內悠悠識者誰
汝有平生故人好副相猶然卧茂陵侍郎已是歸嶺表
況逢少伯共登臨西子湖頭月皎皎人生貧賤何足悲
縱酒高歌白雲杳勝絕容留我輩狂劫灰燒盡雷峰小
落落窮途感快游愧我菰蘆色枯槁佳句流傳遍世間
寄書早慰江潭老

悲歌贈吳季子

松陵人
字漢槎

人生千里與萬里黯然銷魂別而已君獨何為至於此
山非山兮水非水生非生兮死非死十三學經并學史
生在江南長紉綺詞賦翩翩衆莫比白壁青蠅見排抵
一朝束縛去上書難自理絕塞千山斷行李送吏淚不
止流人復何倚彼尚愁不歸我行定已矣八月龍沙雪
花起橐駝垂腰馬沒耳白骨磴磴經戰壘黑河無船渡
者幾前憂猛虎後蒼兕土穴偷生若螻蟻大魚如山不
見尾張鬣為風沫為雨日月倒行入海底白晝相逢半

人鬼噫嘻乎悲哉生男聰明慎勿喜倉頡夜哭良有以
受患祇從讀書始君不見吳季子

織婦詞

黃繭綵絲不成匹停梭倚柱空太息少時織綺貢尚方
官家曾給千金直孔雀蒲桃新樣改異繡奇文不遑識
桑枝漸枯蠶已老中使南來催作早齊紈魯縞車班班
西出玉關賤如草黃龍袱子紫橐駝千箱萬疊奈爾何

贈穆大苑先

從汝寧確山歸確
山余兄純祐治也

穆生同學今頭白讀書不遇長為客亂離諸子互升沉
共樂同愁不相失出入知交三十年江山幾處供游歷
承平初謁武夷君荔支日啖過三百兵火桐江遇故人
釣臺長嘯凌千尺身軀雖小酒腸寬坦腹鄉村話疇昔
訪友新年到蔡州淮西風浪使人愁峭帆直下雙崖險
奇石橫空衆水流泊口斷磯傳禹跡山根雷雨鎖獼猴
舍舟別取中都道寢廟高原陵樹秋定有風雲歸大澤
不堪弓劍弔荒丘仰天太息頻搔首失脚倒墮烏犍牛

偶來帝鄉折左臂吾苦何足關封侯丈夫落落誇徒步
芒鞋踏遍天涯路中原極目滿蓬蒿海內於今信多故
萬事無如散誕游一官必受羈棲誤傷心憔悴朗陵侯
征蹄奔命無朝暮身親芻秣養驂騮供頓三軍尚嗔怒
赤日黃埃伏道旁鞭梢拂面將誰訴故舊窮途識苦辛
掉頭舉世寧相顧嗚呼汝南風俗天下稀死生然諾終
難移相逢應自有奇士客中可以談心期君行千里狗
友急此意豈得無人知

遣悶

秋風泠泠蛩唧唧中夜起坐長太息我初避兵去城邑
田野相逢半親識扁舟遇雨烟村出白版溪門主人立
雞黍開尊笑延入手持釣竿前拜揖十載鄉園變蕭瑟
父老誅求窮到骨一朝戎馬生倉卒婦人抱子草間匿
津亭無船渡不得仰視烏鵲營其巢天邊矰繳猶能逃
我獨何為委蓬蒿搔首回望明星高

其二

雞既鳴矣升高堂問我消息來何方欲語不語心彷徨
當年奔走雖茫茫兩親筋力友風霜上有王母方安康
下有新婦相扶將小妹中夜縫衣裳百口共到南湖莊
只今零落將誰望出門一步紛蜩蟬十人五人委道旁
去鄉五載重相見江湖到處逢征戰一家未遂昇平願
百年那得長貧賤

其三

人生豈不繇時命萬事憂愁感雙鬢兄弟三人我衰病

齒牙落盡誰能信疇昔文章傾萬乘道旁爭欲知名姓
中年讀易甘肥遯歸來擬展雲山興赤城黃海東南勝
故園烽火憂三徑京江戰骨無人問愁吟獨向南樓凭
風塵咫尺何時定故人往日燔妻子我因親在何敢死
憔悴而今困于此欲往從之媿青史

其四

生男歡喜生女憐嗟我無子誰尤天傷心七女盡亡母
啾啾乳燕枝難安一女血淚啼闌干舅姑嶺表無書傳

一女家破歸間關良人在北愁戍邊更有一女憂烽烟
圍城六月江風寒使我念此增辛酸其餘燈下行差肩
見人悲歎殊無端攜手遊戲盈床前相思夜闌更剪燭
嚴城鼓聲振林木衆雖怖向床頭伏搖手禁之不敢哭

其五

舍南春水成清渠其上高柳三五株草閣窈窕花扶疎
園有菜茹池有魚蓬頭奴子推鹿車藝瓜既熟分里閭
忽聞兵馬來城隅南翁北叟當窓趨我杷耒鋤心躊躇

問言不答將無愚老大無成灌蔬壤暫息干戈竊偃仰
舍之出門更何往手種松杉已成長

其六

白頭儒生良自苦獨抱陳編住環堵身歷燕南遍齊魯
摩挲漆經觀石鼓上探商周過三五矻矻窮年竟奚補
岫嶺山頭祝融火百王遺文棄如土馬矢高於瞿相圃
箋釋蟲魚付榛莽寓言何必齊莊周屬辭何必通春秋
一字不向人間留亂離已矣吾無憂

詠拙政園山茶花

并引

拙政園故大弘寺基也其地林木絕勝有王御史者侵之以廣其宮後歸徐氏最久兵興為鎮將所據已而海昌陳相國得之內有寶珠山茶三四株交柯合理得勢爭高每花時鉅麗鮮妍紛披照矚為江南所僅見相國自買此園在政地十年不歸再經謫遼海此花從未寓目余偶過太息為作此詩他日午橋獨樂定有酬唱

以示看花君子也

拙政園內山茶花一株兩株枝交加艷如天孫織雲錦
赭如姹女燒丹砂吐如珊瑚綴火齊映如蠅螬凌朝霞
百年前是空王宅寶珠色相生光華長養端資鬼神力
優曇湧現西流沙歌臺舞榭從何起當日豪家擅閭里
苦奪精藍為翫花旋拋先業隨流水兒郎縱博賭名園
一擲留傳猶在耳後人修築改池臺石梁路轉蒼苔履
曲檻奇花拂畫樓樓上朱顏嬌莫比千條絳蠟照鉛華

十丈紅牆飾羅綺，鬪盡風流富管弦。更誰瞥眼閒桃李，
齊女門邊戰鼓聲。入門便作將軍壘，荆棘從填馬矢高。
斧斤勿剪鶯簧喜，近年此地歸相公。相公勞苦承明宮，
真宰陽和暗迴幹。長安日日披薰風，花留金谷遲難落。
花到朱門分外紅，獨有

君恩歸未得。百花深鎖月明中，灌花老人向前說。園中
昨夜零霜雪，黃沙浙浙動人愁。碧樹垂垂為誰發，可憐
塞上燕支山。染花不就花枝殷，江城作花顏色好。杜鵑

啼血何斑斑花開連理古來少並蒂同心不相保名花
珍異惜如珠滿地飄殘胡不掃楊柳絲絲二月天玉門
關外無芳草縱費東君著意吹忍經摧折春光老看花
不語淚沾衣惆悵花間燕子飛折取一枝還供佛征人
消息幾時歸

短歌

王郎頭白何所為罷官崩表歸來遲衣囊已遭盜賊笑
襤被尚少親朋知我書與君堪太息不如長作五羊客

君言垂老命如絲縱不歸人且歸骨入門別懷未及話
石壕夜半呼倉卒怯隨從他誤攫金告緡憐我非懷璧
田園斥盡散裘難苦乏家錢典圖籍愛子摧殘付托空
萬卷飄零復奚惜吁嗟乎十上長安不見收千山遠宦
終何益君不見鬱孤臺臨數百尺惡灘過處森刀戟歷
遍風波到故鄉此中別有盤渦石

西巘顧侍御招同沈山人友聖虎丘夜集作圖紀
勝因賦長句

漢陽仙人乘黃鵠朝發三巴五湖宿春深潮滿闔閭城
剪得晴川半篙綠錦涇催動木蘭橈恣討名山縱心目
判牘揮毫撥若雲支筇屏騎從惟鹿蒼丘虎氣鬱騰驤
一片盤陀徑廣場平座千人填語笑危欄百尺沸絲簧
夫差石上杯浮月歐冶池邊劍拂霜花雨講臺孤塔迥
風流捨宅六朝荒曾來此地探竒蹟薄晚迎流刺舟入
攜手何人沈與吳詞客青衫我頭白脫略才知興會真
冥搜務取烟霞適大照靈湫暑月寒鍾埋苦霧陰崖黑

魯公擘窠字如斗忠孝輪囷鬼神走蘇剝苔侵耿不磨
手捫沉吟立來久重燒官燭奏鷗絃今夕懼遊逢快友
後約須聽笠澤鶯臨分忍折閭門柳七里山塘五月天
玉絲金管自年年江村茶熟橋成市溪館花開樹滿船
賀老一歌嘗月下泰娘雙槳即門前泥車瓦馬兒童戲
竹几蕉團估客眠萬事韶華有凋替烟蕪漸失層巒翠
鼠竄迴廊僧舍空鴉啼廢井漁扉閉赤憶黃驄佳氣浮
姑蘇臺上春風細令出天清鶴鶴高詩成日落溪山麗

筍屐籃輿逐後塵，碧油簾舫夜留賓。
樓遲我已傷顏老，歷落君偏重散人。
好把丹青垂勝事，可憑詩卷息閒身。
襄陽寺壁摹羊祜，句曲山圖補許詢。
妙手生綃經想像，鬼毫點出雙瞳王。
抱膝看雲見礪砢，揜頤藉草耽疎放。
丰衲誰堪竺道生，一樽足擬陶元亮。
絹素流傳天壤存，他年相見欣無恙。
黃鸝高飛玉笛殘，舊游我亦夢湘沅。
峭帆此去應千里，郢樹參差響急灘。
飲君酒送君還王，程長作畫圖看。
攜將老筆龍眠輩，寫盡江南江北山。

高涼司馬行

贈孫孝若

高涼司馬才如龍，眼看變化疇人中。豪華公子作能吏，
刻苦不與尋常同。十年太末聲名好，隨牒單車向嶺表。
猿嘯天邊雁北飛，相思不斷如春草。官清喜得鄉園近，
載米嘗聞上山郡。此去雖持合浦珠，炎州何處沾佳醞。
君言萬事隨雙屐，浮踪豈必嗟行役。婚嫁簷完身計空，
掉頭且作天涯客。江南賦稅愁連天，笑余賣盡江南田。
京華權貴書盈寸，笑余不作京華信。平生聲伎羅滿前，

襖被獨上孤篷船到日蘭芽開百本飽啖荔枝寧論錢
故舊三人腸幾轉白頭老輩攤吟卷王宰丹青價自高
周郎酒興愁來減三衢橘柚廣州柑夢遶江南與海南
吾谷霜楓迴首處錯認枕椰是鄉樹

魯謙菴使君以雲間山人陸天乙所畫虞山圖索
歌得二十七韻

江南好古推海虞大癡畫卷張顛書士女嬉遊衣食足
丹青價重高璠璣不知何事今蕭索異聞只說姑蘇樂

西施案舞出層臺
瑟瑟珍珠半空落
聞道王孫愛畫圖
購求不惜千金諾
此地空餘好事家
扁舟載入他人索
玉軸牙籤痛惜深
丹崖翠壁精華弱
魯侯魯侯何太奇
此卷留得無人知
一官三載今上計
粉本溪山坐卧持
九峰主人寫名勝
百年絹素猶蒼潤
云是探微後代孫
飄殘兵火遺名姓
我也菰蘆擁被眠
舊遊屈指嗟衰病
忽聽柴門枉尺緘
披圖重起簾輿興
烏目烟巒妙蜿蜒
西風拂水響濺濺
使君自是神仙尉
老我堪依漁釣船

招真沼畔飛黃鵠七檜盤根走麋鹿寫就青山當酒錢
醉歌何必諧絲竹魯侯笑我太顛狂不羨金張誇顧陸
登臨落日援吟毫太息當年賢與豪請為陸生添數筆
絳雲樓榭舊東臯

九峰草堂歌

并序

九峰草堂者青溪諸乾一進士所構也乾一取
第後未仕著書九峰山下每峰皆有卜築而神
山為最明初彭素雲仙翁修真此山徵書至而

蛻去丹井尚存金蛇著異故名神鼉峰焉少參
陸蘭陔誅茅山麓而其旁張王屋先生舊墅有
孫漢度能繼家風余詩中所援陸瑁張融蓋指
兩人也余山為陳徵君眉公隱處吾友董得仲
以詩文為此峰主人乾一葺徵君廢屋置祠而
橫雲為李氏園相望則天馬峰有鐵崖舊墓機
山則二陸故宅也乾一拉余同遊坐客有許九
目沈友聖倪思曼及故人徐陳二子而小司空

張公尋攜尊至凡乞花塲種藕塘仙人棋枰庫
將軍兵書鐵鎖并玉屏石床龍洞虎塔皆一時
杖屨所登歷故叙次及之其詳在九峰誌中

九峰草堂神鼉峰丹崖啟自彭仙翁終南曳杖來採藥
眼看江上飛虬龍紫泥欲下早蟬蛻掉頭不肯隨東封
金蛇三寸戲沙磔玉棺萬古懸虛空仙井曾經鬼神鑿
九還洗出桃花紅霓旌羽節往來過月明鷺鶴吟天風
九峰主人青溪曲上清謫受金門祿一鞭槐市撼鳴珂

脫却朝衫友麋鹿地近寧移許椽家身輕未辟留侯穀
層閣嶽嶽俯碧潭迴廊窈窕穿修竹同志相期四五人
幽棲幾處依林麓陸瑁溪堂薄宦成張融岸屋先人築
曹唐道者伴吹笙註罷南華理松菊

道士曹耕雲同隱

葉落閒

階閣苑鐘熏香小史清如玉主人詩酒真人豪好將蹤
跡從漁樵痛飲恕人容水部

乾一善飲而余口不識杯勺

長吟懷古

繼龍標名高仕宦從教懶金盡妻孥任見嘲是處亭臺
添布置到來賓客共逍遙精藍每與支公會

支公指大衛和尚

快友還將董相招

得仲

我輩漫應誇隱遁此君猶復困蓬

蒿小園涉趣知能賦中歲離愁擬續騷右手酒杯澆塊

壘雙眸書卷辨秋毫

得仲目疾復明

憶昔溪山正全盛徵君比

屋開三徑筍屐籃輿鶯燕忙酒旗歌板花枝映處士詩

成猿鳥知尚書畫就烟巒潤客過嘗逢太守車書來每

接高僧信李氏名園士女遊徐公別墅琴尊興

文貞別業在西

余楔飲壺觴妙妓絃餅師粬粬山翁印

眉公好說餅市者以為名

西

風急浪五湖天四月江村響杜鵑仙客棋枰拋浩劫道

人局鑄隱殘編乞花何處花如錦種藕曾無藕似船鐵
笛已稀天馬逝玉屏雖在石牀鑄秦龍洞暗荒祠雨講
虎經銷妙塔年九峰主人三歎息赤烏臣主真相得儒
將雍容羽扇風歌鐘榮戟王侯宅勲業將衰文字興江
山秀弱機雲出寶玉空埋劍影寒蘆花一片江湖白英
雄已往餘氣在後來往往生遺佚青史人間歲月迨老
鐵歌殘歌白石

眉公自稱
白石山人

我聽君談意悽哽停樽不御

青燈耿相看徐孺與陳郎

閻公大
樽之子

雜坐迂倪

思

偕瘦沈

友
聖彊項還推一老生江都著作攄孤憤得仲展齒俄聞到

茂先一坐傾靡再張飲有客依人話過秦客有談關中事無家

二子同哀郢

即徐陳二子

感舊思今涕淚多荒鷄喔喔催人

寢九峰九峰空嶠岼朝來重上仙翁壇浮生感嘆誠無
端拂衣長嘯投漁竿烟波一葉愁風湍願君授我長生
訣攜向峰頭萬仞看

觀王石谷山水圖歌

世間勝事誰能識兵戈老盡丹青客真宰英靈厭寂寥

江山幻出王郎筆王郎展卷閒窓淨良久呼之曾不應
剪水雙瞳鎮日看側身似向千峰進一時儒雅高江東
氣韻吾推里兩翁師授雖真肯沿襲後生更自開蠶叢
取象經營巧且密丰神點拂天然中頓挫淋漓寫胸臆
研精毫髮摹宗工廣陵花月扁舟送貴戚豪華盛供奉
不惜黃金購畫圖好奇往往輕南宋妙手裝潢技絕倫
殘鱣斷墨俄飛動闔閭城下收藏家誅求到骨愁生涯
僅存數軸用娛老載去西風響鹿車君也侯門跼珠履

晴日湘簾憑畫几
奕罷雙童捧篋來
狎客何知亦咨美
笑持茗椀聽王郎
鑒別妍蚩臻妙理
作者風流異代逢
賞心拊掌王孫喜
枉買青娥十萬錢
移人尤物惟山水
王郎馳譽滿通都
軟裘快馬還東吳
道邊相識半窮餓
致身猶是憂妻孥
羨君人材為世出
盛年絕藝須難得
好求真訣走名山
粉本終南兼少室
攬取荆關入掌中
歸帆重補烟江色
諸侯書幣迷深處
榻管松根醉箕踞
絹素流傳天壤間
白雲萬里飛來去

京江送遠圖歌

并序

京江送遠圖者石田沈先生周為吾高祖遜菴
公之官叙州作也圖成於弘治五年辛亥之三
月京兆祝公希哲允明為之序後一百七十有
八年公之四世孫偉業謹案京兆序而書之曰
公諱愈字惟謙一字遜菴成化乙未進士授南
京刑部主事進郎中清慎明敏號稱職先後九
載南司寇用弘治三年詔書得薦其屬將待以

不次疏未達而命守叙州為守既嘗調叙又險
且遠公獨不以為望南中諸大僚為文以寵其
行太僕寺丞文公宗儒林既已自為文又遍乞
名人之什以贈文公之子待詔徵仲璧即公壻
也石田為文公執友待詔親從之受畫法京兆
之交在文氏父子間故石田為作長卷題以短
歌而京兆序之長卷中平橋廣坡桃柳雜植有
三峰出其上離舟揮袂送者四五人點染景物

皆生動短歌有荔支初紅五馬到江山亦為人
增奇之句其風致可想見焉京兆文典雅有法
度小楷倣鍾太傅體尤其生平不多得詩自都
元敬以下十有五人朱性甫存理劉協中嘉靖
尤以詞翰著名者也先朝自成弘以來一郡方
雅之族莫過文氏而吾宗用世講相輝映當叙
州還自蜀參政河南而文太僕丞出為溫州守
待詔以詩文書畫妙天下晚出而與石田齊名

其於外家甥舅中表多有往還手蹟偉業六七
歲時見吾祖封詹事竹臺公所藏數十紙今大
半散失猶有存者此卷比之它表日月為最久
衰門凋替不知落於何人乃劫灰之餘得諸某
氏質庫中若有神物擁護以表章其先德不綦
幸乎吾吳氏自四世祖儀部冰蘖公以乙科起
家參政再世滋大父子皆八十有重德其行畧
具吳中先賢傳中偉業無似不能闡揚萬一庶

幾邀不朽於昔賢之名蹟而藉手當世諸君子
共圖其傳是歌之作見者其有以教之也

京江流水清如玉楊柳千條萬條綠畫舫勞勞送客亭
勾吳人去官巴蜀巴蜀東南熨道開夷牢山下居民屋
諸葛城懸斷棧邊李冰路鑿顛崖腹不知置郡始何年
卽叙西戎啟荒服吾祖先朝事孝宗清郎遠作蠻方牧
家世流傳餞別圖知交姓字摩挲讀先達鄉邦重文沈
太僕絲蘿共華省徵仲當時尚少年後來詞翰臻能品

師承父執石田翁婉致姻親書畫請相城高卧瀛雲烟
話到相知因笑肯太守嚴程五馬裝山人尺素雙江景
草色官橋從騎行花時祖帳離尊飲碧樹遙遙別袂情
青山疊疊征帆影首簡能書枝指生揮毫定值殘醒醒
狂草平生見儘多愛看楷法藏鋒繁徵仲關心畫後題
石田句把前賢引杜老曾遊擘荔支涪翁有味嘗苦筍
唐戎州宋紹聖四年始改為叙杜子美客游詩有輕紅
擘荔支之句黃山谷貶官作筍賦言苦而有味官况似
之故石田短
歌引此相贈
此地居然風土佳丈人仕宦堪高枕嗚呼

孝宗之世真成康相逢骨肉游羲皇瞿塘劍閣失險阻
出門萬里皆康莊雖為邊郡二千石經過黑水臨青羌
旄牛徼外無傳堠鐵鎖江頭弗置防去國豈愁親故遠
還家詎使鬚毛蒼吾吳儒雅傾當代石田既沒風流在
待詔聲華晚更適枝山放達長無害歲月悠悠習俗非
江鄉禮數歸時態縱有丹青老輩存故家興會知難再
京口千帆估客船金焦依舊青如黛巫峽巫山慘淡風
此州迢遞浮雲礙正使何人送別離登高腸斷烏蠻塞

衰白嗟余老秘書先人名德從頭載廢楮殘縑發浩歌
一天詩思江山外

沈文長雨過福源寺

并序

余以己亥春遊石公山宿文長山館丁未復至
石公水涸挾竒呈異遠過舊游將登歷而風雨
驟至竟覲面失之殊不及我故人之高談蕭寺
追叙夙昔也

昔年訪沈子石公山沒歸雲址今年遇沈公石公水落

盤龍宮沈公家在石公側白頭三見山根出而我分攜
將九載相看總老溪山改石公在望風雨作探得靈竒
復蕭索沈公蠟屐曉衝泥握手精藍話疇昨石公沈公
且別去明日回頭望山樹

秋日錫山謁家伯成明府臨別酬贈

吾家司馬山陰公子弟變化風雲中琱戈帶礪周京改
碣石關河禹穴通秦伯城頭逢季子登高極目霜楓紫
七十烟巒笠澤圖三千歲月勾吳史遍觀易象與春秋

魯頌唐風費考求縞帶贈來同白壁干將鑄就勝純鉤
此中盡說春申澗草荒幸舍飛鳬雁珠履何人解報恩
蒯緱枉自勤垂盼黃初才子好加餐季重翩翩畫省看
早負盛名游鄴下只今詩酒駐江干江干足比梁園勝
追陪衰叟招枚乘八斗君堪跨建安一編我尚慚長慶
剡山東望故人遙玉局金吾未寂寥汗簡舊開都護府
蘭臺新柿侍中貂感君意氣從君飲燈火松窓安伏枕
數枝寒菊映琴心百斛清泉定茶品歸家迴首木蘭舟

鐘鼓高城暮靄收最是九龍山下水伴人離把向東流

題劉伴阮凌烟閣圖

并序

唐閻立本十八學士圖相傳在兵科直房中余
官史局慈谿馮大司馬鄴仙時掌兵都垣嘗同
直禁中出而觀之吏啟篋未及展而馮以上命
宣召遽局鑄而去遂不果今相去三十年六科
廊燬於兵此圖不可問矣按王氏畫苑立本畫
十八學士又畫凌烟二十四功臣故兩圖並行

凌烟圖不著著其所繇失汴梁劉君伴阮天才
超詣書畫尤其所長自鍾王以下八分行草篆
之無不酷似山水雅擅諸家又出新意以繪人
物如所作凌烟功臣圖氣象髣髴衣裝瓌異雖
立本復出無以過焉伴阮遊於方伯三韓佟公
之門暫留吾吳恨尚未識面間取是圖以想像
其為人意必巖嵒磊落有凌雲御風之氣余因
是以窺劉君之才服方伯之知人而深有感於

余之老不足追陪名輩也為之歌曰

大梁才子今劉生客遊書畫傾公卿江南花發遇高會
油幢置酒羅羣英開君書堂拂素壁貞觀將相施丹青
長孫燕頤肺腑戚河間隆準天潢親鄂公衛公與英國
誰其匹者推秦瓊房杜勛勳魏彊諫元僚濟濟高勲名
二十四人半豐沛君王帶礪山河盟千載懸毫寫生面
雙眸顧盼關神明長弓大矢佩刀劍玄袞赤舄垂葱珩
正視橫看叫奇絕一時車馬喧南城余衰卧病滄江口

忽地流傳入吾手細數從前翰墨家海內知名交八九
慘淡相看識苦心殘縑零落知何有技窮仙佛并侯王
四十年來誰不朽北有崔青蚓南有陳章侯崔也餓死
值喪亂維摩一卷兵間留含牙白象貝多樹圖成還記
通都求陳生落魄走酒肆好摹傖父屠沽流笑償王媪
錢十萬裨官戲墨行觥籌劉生三十稱詞伯盛名緩帶
通侯席埋沒休嗤此兩生古今多少窮途客繁臺家在
汴流平老我相逢話鋒鏑剩有開河出後生枉將兵火

催衰白君不見秘書高館羣儒修歐虞褚薛題銀鈎朔
州老將解兵柄折節愛與諸生游丈夫遭際好文日布
衣可以輕兜鍪似君才藻妙行草況工絹素追營丘它
年供奉北門詔大官賜食千金裘嗚呼石渠麟閣總天
上凌烟圖罷圖瀛洲

白燕吟

雲間白燕菴素海叟丙舍在焉吾友單狷菴隱
居其傍鴻飛冥冥為弋者所篡故作此吟以贈

之余年二十餘遇狷菴於陳徵君西余山館有
歌者在席迴環昔夢因及其事狷菴解組歸田
遭逢多故視海叟之西臺謝病倒騎烏犍牛以
智僅免者均有牢落之感俾讀者前後相觀非
獨因物比興也

白燕菴頭晚照紅摧頽毛羽訴西風雖經社日重來到
終怯雕梁故壘空當年掠地爭飛俊垂楊拂處簾櫳映
徵君席上點微波雙棲有箇凝粧靚趙家姊妹鬪嬋娟

軟語輕身鬢影偏錯信董君它日寵昭陽舞袖出尊前
長安穠杏翩躚好穿花捎蝶春風巧楚雨孤城儔侶稀
歸心一片江南草綺素還家念主人瓊樓珠箔已成塵
雪衣力盡藍田土玉骨神傷漢苑春銜泥從此依林木
窺簷詎肯樊籠辱高舉知無鴻鵠心微生幸少烏鳶肉
探卵兒郎物命殘朱絲繫足柘弓彈傷心早已巢君屋
猶作徘徊怪鳥看漫留指爪空迴顧差池下上秦淮路
紫領關山夢怎歸烏衣門巷雛誰哺頭白天涯脫網羅

向人張口為愁多啁啾莫向斜陽語為唱素生一曲歌

梅村集卷七